

ABSTRAK

Disertasi ini adalah merupakan satu kajian tentang institusi fatwa dan peranannya dalam menangani permasalahan yang berkaitan dengan hukum syarak dan membantu orang ramai memahami, menghayati dan mengamalkan ketentuan hukum syarak.

Penulisan disertasi ini telah dibahagikan kepada lima bab. Bab satu menggambarkan sejarah ringkas kewujudan institusi fatwa yang bermula dari zaman Rasulullah s.a.w hingga terbentuknya institusi fatwa yang ada sekarang. Ia diteruskan dengan perbincangan tentang keperluan melantik mufti dan syarat-syarat mufti serta maklumat-maklumat mengenai pembentukan dan peranan beberapa institusi fatwa kerajaan masa kini yang berfungsi sebagai tempat rujukan kerajaan dan masyarakat. Antara institusi fatwa yang dipaparkan dalam bab ini ialah Dār al-Iftā' al-Misriyyah Mesir, Majelis Ulama Indonesia, Jawatankuasa Fatwa Malaysia, Jawatankuasa Fatwa Singapura dan Majlis Syaikh al-Islām Thailand.

Bab dua membincangkan secara khusus mengenai sejarah perkembangan fatwa di Negara Brunei Darussalam. Ia berlatarbelakangkan pemerintahan Negara Brunei Darussalam dan peranannya dalam mengembangkan Islam di Negara Brunei Darussalam. Senario inilah yang banyak mempengaruhi kewujudan institusi fatwa di Negara Brunei Darussalam. Kemudian diikuti dengan sejarah pembentukan institusi

fatwa dan perkembangannya sehingga pembentukan Jabatan Mufti Kerajaan yang diisytiharkan pada 7 November 1994.

Bab tiga membincangkan perkara-perkara yang berkaitan dengan prosedur pengeluaran fatwa dan penguatkuasaannya. Dalam bab ini penulis lebih banyak menumpukan perbincangan tentang peruntukan undang-undang menurut Akta Majlis Ugama Islam Dan Mahkamah-Mahkamah Kadi Penggal 77 disamping analisa penulis mengenainya.

Bab empat merupakan paparan maklumat mengenai koleksi fatwa Mufti Kerajaan Negara Brunei Darussalam dan contoh-contoh fatwa yang memperlihatkan metodologi fatwa dan rujukan-rujukannya.

Bab lima lebih menjurus kepada peranan dan sumbangan Jabatan Mufti Kerajaan Negara Brunei Darussalam. Peranan dan sumbangan utama yang ditunjukkan ialah keberkesanan fatwa dalam pentadbiran Kerajaan dan keberkesanan fatwa dalam meningkatkan kefahaman dan amalan beragama dikalangan masyarakat. Penulis seterusnya membentangkan peranan dan komitmen Jabatan Mufti Kerajaan dalam menyebarkan ilmu-ilmu Islam. Untuk memantapkan kandungan bab ini penulis memuatkan hasil soal-selidik yang memperlihatkan kefahaman masyarakat terhadap institusi fatwa dan keberkesanan fatwa dalam kehidupan masyarakat Negara Brunei Darussalam.

Disertasi ini diakhiri dengan penutup yang merupakan kesimpulan sebagai hasil kajian dan diikuti dengan beberapa pandangan penulis sebagai saranan.

Kajian ini diharapkan dapat menambah maklumat penting berkaitan dengan fatwa dan institusi fatwa kepada masyarakat khususnya para penyelidik.